

太平寰宇記

第十四册



太平寰宇記卷之四十九

河東道十

代州

寶興軍

雲州

代州

代州

鴈門郡今理鴈門縣

古唐國之地禹貢冀州之域歷代所

屬與并州同春秋為晉地其後三卿分晉其地屬

趙即趙有代句注之北是也按河東記云代句注

在州西北三十五里鴈門縣界西陁山也初趙襄

子殺代王而取其地至趙武靈王破林胡樓煩築

長城自代傍陰山下至高關為塞而置雲中鴈門

代郡後北境復屬燕秦莊襄王三年攻狼孟取三十七城卽此地秦併天下爲太原鴈門二郡之地又云始皇十三年移樓煩郡于善無縣今句注山北下館城是也故續漢書鴈門郡領縣十四理陰館漢因之後漢書云建安二年又立新興郡于太原北界後廢之漢末匈奴侵邊其地荒廢魏文帝移鴈門郡南度句注置廣武城卽今州西故城是也晉如之後魏置梁城繁峙二郡于此尋廢之明帝又移置廣武東古上館城內卽今府城是也後周置肆州大象元年自九原城移肆州于此隋開

皇五年改爲代州取古代郡爲名大業中改爲鴈門郡隋末喪亂陷于寇境唐武德元年置代州總管管代忻蔚三州代州領鴈門繁峙崞五臺四縣五年廢總管六年又置管代忻蔚朔四州貞觀四年又督靈州六年又督順州十二年省順州以懷化縣來屬今督代忻蔚朔靈五州高宗廢懷化縣證聖元年置武延縣天寶元年改爲鴈門郡依舊爲都督府乾元元年復爲代州

元領縣五

鴈門 五臺 崞縣 繁峙 唐林

州境

東西三百二十里 南北二百二十八里

四至八到

南至東京一千七百里

南至西京一千三百三十里

西南至長安一千六百里

東至蔚州二百六十里

南至太原府五百里

西至嵐州界一百六十里

北至朔州界一百四十六里

東南取崩石嶺至鎮州五百四十里

西南至忻州二百五十里

西北至朔州二百二十四里

東北至蔚州四百里

戶

唐開元戶一萬五千七百七

皇朝戶主三千五百六十七客二千四百一十五

風俗

鴈門并州屬郡也其風俗與太原略同然自代北至雲朔等州北臨絕塞之地封略之內雜虜所居

戎狄之心鳥獸不若歎饑則剽劫豐飽則柔從芽
報冤仇號為難制不憚攻殺所謂衽金革死而不
厭者是也縱有編戶亦染戎風比于他邦實為難
理

人物

周黨

字伯况廣武人少孤為宗人所養徵為議郎以病去職居澠池也

王霸

字儒

仲太原廣武人少有清節建武中徵到稱名不稱臣有司糾之問其故對曰天子有所不臣諸侯有所不友
趙至 字景真代州人
郝隆 字佐洽崞人無書不讀

土產

麝香

天花

豹尾

地菜

鵬翎

貢

賦麻布

青磧貢

長松子

鴈門縣

一十鄉

本漢廣武縣地屬太原郡後漢改屬鴈

門郡隋開皇三年罷郡縣屬肆州後改肆州爲代州屬不改十八年改廣武縣爲鴈門縣避太子之諱也又圖經云邑地井泉鹹苦民皆負輦遠汲魏

牽招爲郡鑿原爲渠注水城內迄今民賴其益

累頭山在縣西北六十里卽句注陁西北三十五里山也石鼓山郡國志云代郡石鼓在山下橫臥高一丈八尺腰細有過繩處覆宿山一名牛心山一名伏牛山在縣東南十五里夏屋山一

太平寰宇記卷之四十九
名下壺山又名賈屋山在縣東北三十五里史記

云趙襄子北登夏屋誘代王使廚人操銅料音擊擊

殺之遂有代地 句注山一名西陁山在縣北三

十里爾雅爲北陵西隃鴈門是也注云卽鴈門山

也水經注云鴈門郡北對句注東陁其南九塞之

一也晉咸寧元年句注碑曰蓋北方之險有盧龍

飛狐句注爲之首天下之阻所以分別內外也漢

高祖欲伐匈奴不從婁敬之說械繫于廣武遂踰

句注困于平城謂此也 滹沱水在縣南 河神

祠在縣南開元九年并州長史張說奏置 龍泉

水源出縣西北平地水經注云龍泉出鴈門縣西
平地其大三輪泉源湧沸騰波奮發以巨石投之
水輒噴出亦云潛通燕京山之天池也 常溪水
郡國志云鴈門有常溪水 廣武故城漢故廣武
縣城今在郡西南漢高祖械繫劉敬于此地後敗
尋封敬以侯之又冀州圖云廣武縣城在句注陘
南口之南二十里 靈邱故城郡國志鴈門靈邱
縣有搗藥溪是也 故平城縣城後漢末立故縣
城在西南 參合城漢代郡之縣名柴武斬韓王
信于此地後廢縣城存 棗戶城隋圖經云初築

此城以地多棗樹為名土人云此棗多輸北京

武州城在縣西六十里東魏置武州領吐京齊新

安三郡以統軍戶齊改曰北靈州是也 東陘關

地甚險固在郡南二十里 西陘關在縣西北五

十里 武州塞在鴈門漢武時單于將十萬騎入

武州是也 拓跋陵 郅都墓郡國志云漢郅都

為鴈門太守匈奴憚之不敢近塞葬鴈門墓側古

柏五千餘株今號曰郅君柏

五臺縣 東南一百二十里五鄉 本漢慮 音廬 虎 音夷 縣屬太原郡因

慮虎水為名晉省後魏孝文帝復置即今理是也

屬新興郡高齊改屬鴈門郡隋大業二年改爲五臺縣因縣東五臺山爲名 五臺山在縣東北一

百四十里水經注云五臺山五巒巍然故謂之五

臺晉永嘉三年鴈門郡獲音人縣百餘家避亂入

此山見山人爲之先驅因而不返遂置巖野往還

之士稀有望見其村居者至詣訪莫知所在故俗

人以此山爲仙者之都矣 中臺山山頂方三里

近西北陬有一泉水不流謂之太華泉蓋五臺之

層秀仙經云此山名紫府常有紫氣仙人居之內

經以爲清涼山 聖人阜水經注云滹沱水東流

經聖人阜阜下有泉泉側石有十二手跡其西復有二腳跡甚大莫窮所自在縣西南四十八里

仙人山在縣東南五十里石岳上有人坐跡山腹石上有手跡山下石上有雙腳跡皆西向立 渾

河出板迴山 慮虜水在縣北十五里源出縣界漢因此水以立縣 張公城十六國時石勒將張

平築城東有平碑

崞縣西南十五里八鄉漢舊縣因山為名屬鴈門郡漢末荒

廢晉初又置後魏改為石城縣至東魏會置廓州于此以廓闢土疆為稱尋廢分為廣安永定建安

三郡以領軍戶後齊省郡又立北顯州後周廢隋

開皇十年改縣為平寇大業初改為崞縣焉崞音廓

雲中城在縣西一百里即管涔之異名也樓

煩故城漢為縣故城在今縣東石門關在縣西

北八十里滹沱水在縣東二百步

繁時縣東六十里五鄉本漢舊縣屬鴈門郡漢末匈奴侵寇

舊縣荒廢晉又置繁時縣後周省隋開皇十八年

復置于今縣東六十里大堡戍大業十二年移于

武州城唐聖曆二年以縣在平川難以固守遂東

移于今理其城三面枕澗東接峻坂極為險固

太平寰宇記 卷之四十九
泰戲山一名武夫山亦名平山亦曰戍夫山今日
派山在縣東南九十里山海經云泰戲之山滹沱
之水出焉郭璞注云滹沱出武夫山也 滹沱河
源出縣東南孤阜山山海經云滹沱之水東流注
于婁水冀州圖云又經繁峙故城西三里與五泉
合又西南入樓煩郡秀容界又還入崞縣又入秀
容界東北入五臺南入恆山界

唐林縣

西南一百一十里九鄉

漢廣武縣地唐證聖元年分五

臺崞二縣于忻代二州界置武延縣神龍已後改
爲唐林縣梁開平二年改爲白鹿縣後唐同光初

復舊晉改爲廣武後復舊 連枷棒山名在邑界

滹沱水在縣東

寶興軍

寶興軍者本代州烹銀之冶務劉繼元割據之時建
爲寶興軍地屬五臺山寺皇朝平河東因之不改

雲州

雲州

雲中郡今
理雲中縣

禹貢冀州之域虞及周屬并州之地

春秋時爲北狄地戰國時其地屬趙其後武靈王
自代至高闕爲塞而置雲中鴈門代郡今州卽秦
鴈門郡地在漢爲鴈門郡之平城縣也史記云漢

七年韓王信亡走匈奴上自將遂至平城爲匈奴所圍用陳平秘計得出是也漢末大亂匈奴侵邊自定襄以西雲中鴈門西河遂空曹操鳩集散亡又立平城縣屬新興郡晉又改屬鴈門晉亂劉琨表封猗盧爲代王都平城後魏道武又于此建都東至上谷軍都關西至河南至中山隘門塞北至五原地方千里爲甸服孝文帝改爲司州牧置代尹孝文遷都洛邑改置恆州孝昌之際亂離尤甚恆代之北盡爲邱墟高齊文宣天保七年置恆安鎮徙豪傑三千家以實之今名東州城其年廢鎮

又置恆州周平齊州郡並廢又于其所置恆安鎮屬朔州自周迄隋仍爲鎮也隋亂陷賊唐武德四年平劉武周六年置北恆州七年廢貞觀十四年自朔州北界定襄城移雲州及定襄縣于此永淳元年爲默啜所破移百姓于朔州開元十八年復置雲州及雲中縣天寶元年改爲雲中郡升大同軍節度乾元元年復爲雲州後唐同光二年復爲大同軍節度

元領縣一

雲中

州境

東西一百七十七里 南北四百九十里

四至八到

南至東京

缺

南至西京一千五百九十里

西南至長安一千九百六十里

東至天城軍六十里

東至納降守捉九十里

約與幽州分界

東至清塞城一百二里

東至桑乾都督帳一百五十里

東取寧武媯州路至幽州七百里

南至代州界一百六十里

西至都尖谷五十里

西至靜邊軍一百八十里

北至長城三百里卽蕃界

北至土河四百里

東南至勝州四百里

西南至神堆柵九十里

西南至太原七百里

西北至蕃柵一百六十里

正西微北至單于都護府三百里

東北至陽河曲三百四十里即蕃界

戶

唐開元戶三千一百六十九

風俗

同代州

人物

無

土產

鵬翎 羊馬

菘蓉

犛牛尾

貢

郡國志云雲

中五原唾出口成冰言苦寒也

雲中縣

七鄉

本漢平城縣屬鴈門郡漢末大亂其地遂

空魏曹操又立平城縣屬新興郡晉改屬鴈門郡
後魏于此建都屬代尹孝文改代尹爲恆州縣屬
不改隋爲雲內縣之恆安鎮武德六年置北恆州
貞觀十四年自朔北定襄城移雲州于此置因爲
定襄縣永淳元年爲賊所破因廢雲州及縣開元
二十年與州復置仍改爲雲中縣單于臺在縣
西北四百二十里漢武帝元封元年冬制曰南越
東甌咸服其辜西蠻北夷頗未輯睦朕將巡幸邊
垂擇兵振旅躬執武節置十二部將軍親帥師焉
行自雲陽北歷上郡西河五原出長城北登單于

臺至于朔方臨北河勒兵十八萬騎旌旗經千餘里威振匈奴遣使者告于單于曰南越王頭已懸于漢北闕矣單于能戰天子自將兵待邊不能亟來臣服何但亡匿幕北寒苦之地為匈奴讐焉蓋其處也 都田貴山郡國志云後魏行宮在此山俗曰河頭殿也 火山在縣西五里水經注云西溪水道源火山山有火井南北七十步廣減尺許深不見底炎熱上升常若雷之發響以草爨之則烟騰火發其山以火從地中出亦名熒臺井東五六尺有湯井廣輪與火井相狀熱勢亦同以草內

之則不然皆沾濡露結故俗以湯井爲目井東有
火井祠歲時祀之井北百步有東西谷廣十許步
南岸下有風穴其大容人其深不測穴中肅肅常
有微風雖三伏亦須重裘凜冽人不敢當 奚望
山在郡東一百里 採掠山後魏孝文帝掠地之
處在郡東 白登臺在縣東北三十里漢書匈奴
傳冒頓南踰句注攻太原高帝自將擊之冒頓誘
漢兵漢兵北逐之高帝先至平城步兵未盡到冒
頓縱精兵三十萬圍高帝于白登七日冀州圖云
古平城在白登臺南三里有水焉其城東西八里

九平寰宇記 卷之四十九
三
南北九里 白道泉郡國志云白道高坂有土穴
出泉卽古曲謂之飲馬長城窟 金河水郡國志
云雲中郡有紫河鎮界內有金河水其泥色紫故
曰金河 街河水水經注云雲中街河水西南合
桑乾河水 君子津冀州圖云雲中郡南有君子
津卽大河之津又冀州圖云河水西從榆林郡界
入至州西南入馬邑郡界 乙速狐隋圖經云乙
速狐代郡之浸名也源出馬邑郡南 林胡此州
卽古雲中郡林胡之地趙武靈王北破林胡樓煩
以置此郡 善無城後魏善無縣隋廢今故城存

桐過縣城冀州圖云桐過城在郡西五十里漢
爲縣卽中部都尉理所 武進故城東百四十里
漢西部都尉理所 班氏故城漢爲班氏縣地理
志屬代郡又郡國志俗名去留城今廢城存 北
學城鎮北四十里漢右部都尉理所 雲中故宮
後魏所都築之在故城東四十里 高柳 武周
桑乾 東安陽 道人 且如 馬城 平邑
陽原 昌平 參合 當城 柏山 永固
已上並漢舊縣 紫塞長城冀州圖云大同以西
紫河以東橫互而東至碣石以來綿互千里崔豹

古今注云秦始皇築長城土氣皆紫故曰紫塞

陰山道按冀州圖云雲中周迴六十里北去陰山
八十里南去通漠長城百里卽白道川也南北遠
處三百里近處百里東西五百里至良沃沙土而
黑省功多獲每至七月乃熱白道川當原陽鎮北
欲至山上當路有千餘步地土白如石灰色遙去
百里卽見之卽是陰山路也從此以西及紫河以
東當陰山北者唯此道通方軌自外道皆小而失
次者多 青坡道冀州圖云青坡道自平城東南
四十里西北出至紇真山東北斜向平城西門山

東出經白登山南腳一百步仍東迴二十里出渴
鉢口更北行六十里至陽門口其道始達魏聖武
田于山澤神女自天降聖武與之交後期一歲復
會生一男卽神元留之上昇而去神元卽魏始祖
也按入塞圖云從晉陽西北行百八十里至新興
又西行二百五十里至馬邑又東北行二百五十
里至平城又直東行二百二十里至高柳城又東
行一百八十里至代郡城又東北行一百七十里
至大甯城當涿郡懷戎縣北三百里也從大甯西
北行百里至懷荒鎮又北行七百里至榆關又北

行二百里至松林又北行千里方至瀚海又一道
從平城西北行五百里至雲中又西北五十里至
五原又西北行二百五十里至沃野鎮又西北行
二百五十里至高闕又西北行二百五十里至郎
君成又直北三千里至燕然山又北行千里至瀚
海自晉陽至瀚海有此路又冀州圖云引入塞三
道自周秦漢魏以來前後出師北伐唯有三道其
中道正北發太原經鴈門馬邑雲中出五原塞直
向龍城卽匈奴單于十月大會祭天之所也一道
東北發向中山經北平漁陽向白檀遼西歷平岡

出盧龍塞直向匈奴左地卽左賢王所理之處一
道西北發自隴西經武威張掖酒泉燉煌歷伊吾
塞匈奴右地卽右賢王所理之處自晉陽以北地
勢漸寒平城馬邑凌原二丈雲中五原積冰四五
十尺唾出口成冰牛凍角折而畜牧滋繁 紇真
山在縣東三十里虜語紇真漢之言三十里其山
夏積雪霜 廢單于都護府秦漢時雲中郡城也
唐龍朔三年置雲中都護府麟德元年改爲單于
大都護府東南至朔州三百五十七里振武軍在
縣城內置在長安東北三千三百五十里去洛陽

太平寰宇記卷之四十九
置
二千里天寶時戶二千一百領縣一金河與府同

太平寰宇記卷之四十九終

太平寰宇記卷之五十

河東道十一

威勝軍

大通監

平定軍

岢嵐軍

火山軍

寧化軍

威勝軍

威勝軍

理銅鞮縣

本潞州銅鞮縣地皇朝太平興國二年

四月于此建軍仍割銅鞮武鄉二縣來屬至太平

興國六年又割廢沁州之沁源縣以隸焉

領縣三

銅鞮

武鄉

沁源

沁州割到

軍境

東西二百二里

南北二百四十三里

四至八到

東南至東京新置軍未有里數

東至黎城縣一百五十六里

西至大通監綿上縣九十里

南至屯留縣一百四十三里

北至遼州榆社縣一百五十三里

東南至襄垣縣一百五里

西北至綿上縣一百二十五里

西南至和川縣二百三十二里

東北至遼州遼山縣二百二十里

戶

舊戶屬潞州

皇朝戶主四千一百七十二客三百二十七

風俗 同潞州

土產

人參 貢

銅鞮縣 元十鄉 本漢舊縣以銅鞮水為名春秋時晉別

邑左傳鄭伯如晉晉人執諸銅鞮晉太康地記云

銅鞮故晉大夫羊舌赤邑時號赤爲銅鞮伯華漢
以爲縣屬上黨郡隋開皇十六年改屬沁州大業
二年省沁州復還潞州唐武德六年屬韓州貞觀
十七年州廢復入潞州 闕與城今名烏蘇城在
縣西北二十里史記秦昭襄王三十八年秦伐韓
軍于闕與趙王問趙奢奢對曰其道遠險狹譬猶
兩鼠鬪于穴中將勇者勝王乃令趙奢將救之大
破秦軍遂解闕與之圍漢高紀曰韓信破代擒代
相夏說于闕與孟康注邑名在上黨涅縣也 斷
梁城在縣東北三十里下臨深壑東西北三面阻

澗廣袤二里俗謂之斷梁城 銅鞮山在縣西二

十里本名堯山天寶六年勅改爲銅鞮山山高

千五百五十尺 銅鞮水水經注云銅鞮水出覆

釜山經襄垣縣道是也又冀州圖云烏蘇城在縣

西北二十里有銅鞮水是也 故甲水城隋開皇

十八年置甲水縣縣故城在今縣北七十里 石

梯山在縣西南七十里水經注云銅鞮西有梯山

高一千九百尺 銅鞮城在縣南一十五里本晉

銅鞮宮上黨記云銅鞮有晉宮闕猶存子產曰銅

鞮之宮數里 叔向墓在縣東一十八里 晉大

大... 卷之五十一 三

夫羊舌伯華墓在縣南六十里晉太康地記云銅鞮晉大夫羊舌食邑時號曰銅鞮伯華墓高一丈

五尺

武鄉縣

東北六十里舊八鄉今七鄉

本漢涅氏縣地屬上黨郡晉

始置武鄉縣屬上黨郡石氏分上黨涅沾二縣置

武鄉郡縣屬焉後魏太和十五年自故涅城移武

鄉郡于南亭川隋開皇初廢郡縣屬潞州十八年

置韓州縣屬焉唐貞觀十七年廢韓州縣歸潞州

冀州圖云今理即古榆社故城也 侯甲山今名

護甲嶺水經注云涅縣胡甲山有長嶺謂之胡甲

嶺劉歆遂初賦云登侯甲而長驅是此也 涅城
冀州圖云涅城在縣西六十里後魏初于此立豐
州北齊改曰戎州後周廢之 禿頂山在縣西北
九十里 石白嶺在縣北六十五里 護甲水在
縣西北八十八里 鞞山按石勒會于此聞鼓鞞
聲因告其母母云汝作勞耳鳴非有感也山在縣
東北六十里 武鄉水在縣西六十餘步源出遼
州平城縣南八賦嶺西南流入榆社縣界武鄉故
城下因名武鄉水

沁源縣

西一百五里舊管五鄉今五鄉

漢穀遠縣地元屬上黨舊縣

在今縣南一百五十步沁源孤遠故城是也按晉
 地記云穀遠今名孤遠卽後代語訛耳後魏建義
 元年于今所置沁源縣因沁水名之屬義寧郡隋
 開皇三年罷郡屬晉州十六年置沁州縣來屬皇
 朝割隸軍 霍山山闊故歷于郡界太岳也在縣
 西七十八里 沁水在縣東一里北自綿上縣界
 流入 廢沁州本陽城郡理沁源縣州之分域自
 漢已前歷代所屬與潞州同又晉侯耀武德之墟
 卽漢上黨郡之穀遠縣地也按穀遠縣在今州南
 一百五十步沁源縣南孤遠故城是也語音訛故

謂之孤遠耳魏晉因之後魏屬義寧郡隋開皇初
置沁州煬帝廢州爲沁源縣以屬上黨郡義寧元
年置義寧郡領沁源銅鞮綿上仍分沁源置和川
凡四縣唐武德元年改爲沁州因沁水爲名二年
分沁源置招遠縣三年省招遠縣六年以銅鞮屬
韓州天寶元年改沁州爲陽城郡乾元元年復爲
沁州皇朝平僞晉廢沁州以沁源縣入威勝軍綿
上縣入大通監和川縣入晉州

大通監

大通監

治交城縣

本漢晉陽古交城之地管東西二治烹

鐵之務也東治在綿上縣西治在交城縣北山唐
天授二年隨縣移于卻波村卽今理是也先天二
年又置盧川縣開元二年廢

領縣二

交城 綿上

監境

東西一百六十里

南北一百九十里

四至八到

東至東京

缺

南至西京九百里

西南至長安一千二百二十里

東至清源縣四十里

西至石州離石縣二百三十里

北至樓煩靜樂縣二百三十里

東南至文水縣四十五里

西南至文水縣二十五里

西北至離石縣二百二十里

東北至晉陽縣一百里

戶

皇朝戶主二千七百九客五百二十一

風俗 同并州

土產

鐵

柏子

出縣北狐突山
南每年採進

交城縣

舊十二鄉
今四鄉

本漢晉陽縣地齊于此置牧隋開

皇十六年析晉陽置交城縣屬并州因縣西北古

交城為名唐天授二年長史王及善自山北古交

城移就卻波村置 廢盧川縣在縣東北九十五

里唐天授二年移交城于山南平川卻波村置開

元二年以盧川縣非要衝因廢 交城山在縣北

一百三十五里出磨石 西山治在監西文谷內

義泉社去監六十里此治取狐突山鐵鑛烹鍊
少陽山在縣西南九十五里山海經云少陽之山
酸水出焉其上多玉其下多赤銀郭璞注云銀之
精者 羊腸山郡國志云萬根谷山卽羊腸坂也
在縣東南五十三里石磴縈委若羊腸後魏于此
立倉名羊腸倉皇甫謐曰羊腸塞在龍山卽晉陽
西北九十里古西河上郡置關于此隋煬帝大業
四年經此幸汾陽改名深谷嶺今嶺上有故石墟
俗云魏太武帝避暑之所地理志云上黨壺關亦
有羊腸坂在今潞州界不謂此也 萬根谷冀州

太平寰宇記 卷之五十一
圖云萬根谷卽向交城道亦羊腸道也 汾陽城
在縣東北九十一里後魏曰陽谷曲城 童子谷
隋圖經云在縣東六十三里齊天保七年有童子
數人放牧見山上巨石遂發心建佛像高一百一
十尺 陽曲故城在縣西南七十里開皇六年改
爲陽直 狐突山在縣西南五十五里出鐵鉞
汾水西北自嵐州靜樂界流入 文谷水出縣西
南文谷水經云文谷水出大陵縣西山文谷按大
陵縣在今文水縣北十三里大陵故城是也發源
此城東南流入文水縣界

綿上縣

舊四鄉今三鄉

本穀遠之地晉省穀遠以其地屬介

休隋開皇十六年分介休縣南界置此縣屬沁州

取晉封介之推地爲縣名卽綿上之地也皇朝太

平興國四年割屬本監 羊頭山一名謁戾山在

縣東北五十里沁水所出 介山橫嶺卽之推焚

身之所 沁水一名少水源出縣東南二十四里

覆甌山南流入上黨又左傳齊侯伐晉戍郟邵封

少水卽謂此注云封晉尸于少水爲京觀卽沁水

也 霍山在縣西八十里

平定軍

平定軍治平定縣本并州廣陽縣皇朝平晉陽以此縣先歸乃立平定軍仍改廣陽縣爲平定縣并樂平縣以屬焉

領縣二

平定 樂平

軍境

東南二百三十里 西北一百五十里

四至八到

圖經上未有至東西京里數

東至土垠嶺一百五十里接鎮州元氏縣界

南至遼州和順縣界八十里

西至并州壽陽縣界八十里

北至鎮州平山縣界九十里

東北至娘子關接鎮州并陘縣界九十里

東南至趙州贊皇縣界一百二十里

西南至并州壽陽縣界九十里

西北至并州孟縣界九十里

戶舊戶屬并州籍

皇朝戶主一千七百五十六客二百三十六

風俗同并州

土產

同并州

平定縣

元五鄉

本漢上艾縣地屬太原郡後漢屬常山

國晉屬樂平郡後魏改上艾縣為石艾縣屬樂平

郡隋開皇三年罷郡改屬遼州大業二年省遼州

後屬并州唐武德三年又屬遼州今太原府樂平

縣理是也六年改屬受州貞觀八年廢受州後屬

并州天寶元年改為廣陽縣因縣西南八十里廣

陽故城為名至皇朝改為平定 浮山在縣東南

二十五里 畢發水一名阜漿水亦名妒女泉源

出縣東北董卓壘東今其泉初出大如車輪水青

碧泉傍有祠土人祀之婦女炫服靚妝必興雷雨
故曰妒女泉郡國志云介之推之妹也故老傳云
此泉中有神似鼈晝伏夜遊神出水隨神而涌其
水東北流入井陘界 廢受州城在縣西北三十
里舊名塞魚城武德八年因故蹟築移受州理此
貞觀八年廢 盤石故關在縣東北七十里 葦
澤故關在縣東北八十里 董卓壘在縣東北八
十里水經注云畢發水經董卓壘東 妒女祠在
縣東北九十里按唐書高宗將幸汾陽狄仁傑爲
支頓使并州長史李冲玄緣道出妒女祠俗傳有

盛服車馬過者必致風雷之異遂徵十萬餘眾更
開別道以避之公曰天子行幸千乘萬騎風伯清
塵雨師灑道何妒女之敢害而避之哉遂止其役
還具以聞帝歎息曰真大丈夫也 井陘故關在
縣東八十里卽韓信破趙之所 舊廣陽縣城在
軍東南三里

樂平縣 南六十里舊本漢沾 丁念切 縣屬上黨郡晉于

此置樂平郡沾縣屬焉又別置樂平縣後魏太武
帝省樂平郡及縣孝明帝于今儀州和順縣重置
樂平郡及縣高齊移理沾城卽今縣是也隋開皇

十六年于此置遼州縣屬焉大業二年省遼州以
樂平屬并州唐武德六年屬受州貞觀八年省受
州縣改屬并州 少山一名河逢山在縣西南十
里福地記云河逢山在樂平沾縣高八百丈可避
兵水此卽恆山之佐命也 沾嶺在縣西南二十
里 清漳水出縣西南少山山海經云少山清漳
水出焉今按清漳水出樂平濁漳水出潞州長子
縣界 縣城卽漢沾縣城也隋文帝更加修築
昔陽故城一名夕陽城在縣東五十里左傳曰晉
荀吳假道于鮮虞遂入昔陽滅肥以肥子歸七國

時趙戍于此 樂平山在縣東七十六里卽古東
山皋落氏之地漢縣因山以名

岢嵐軍

岢嵐軍

理嵐谷縣

在樓煩郡北百里隋大業中置岢嵐鎮

押草城川賊路唐長壽中李迥秀置軍長安三年
于此置嵐谷縣神龍二年廢開元十二年重置縣
今復爲軍舊取東北岢嵐山爲軍名

岢音賀

領縣一

嵐谷

軍境

東西一百五十里

南北一百三十里

四至八到

元無至東西二京里數

東至雪山六十里與朔州分界至朔州一百六十里

北至嵐州火山軍一百六十里

東南至嵐州宜芳縣九十里

東北至朔州一百六十里

西北至嵐州定羌軍一百二十里

西南至嵐州合河縣一百七十里

戶

皇朝戶主一千三十二客三百一十八

風俗

同嵐州

土產

同嵐州

嵐谷縣

舊六鄉今四鄉

舊岢嵐軍也在宜秀縣北界隋大業

中置岢嵐鎮押草城川賊路唐長安三年分宜芳

于此置嵐谷縣神龍二年廢縣置軍開元十一年

復置縣今于縣復置岢嵐軍 岢嵐山在縣東二

里 古長城從東北朔州界入本縣界六十里縣

北過西九十里入嵐州合河縣界即秦之長城也

雪山在縣東北四十里高三十里長六十里嵐
朔二州分界 苛嵐河在縣東水從嵐州宜芳縣
走馬嶺下流出去縣四十里西入合河縣界 熒
臺山地中出火因名熒臺上復有火井

火山軍

火山軍在于嵐州火山之下皇朝平晉後置控臨邊
境仍以火山爲名 火山在軍東四十里

軍境

東西

缺

南北

缺

四至八到

圖經上未有至二京里數

東至白鴿寨七十里

南至崙嵐軍一百六十里

西至黃河七里

北至雄勇鎮界二十里

西南至定羌軍界七十里

西南至府州五十里

西北至黃河中心慈母灘一百里

西北至朔州界六十里

戶

皇朝戶主二百五十五

寧化軍

寧化軍本嵐州之故軍東北接蕃界皇朝太平興國六年改爲寧化軍 汾河上源 雪山 蘆衙尖山已上並在軍界

軍境

東西

缺

南北

缺

四至八到

東至忻州界從合寨九十里

南至嵐州靜樂縣六十里

太平寰宇記 卷之五十一
正南以西至嵐州一百二十里

北至契丹界橫嶺六十里自嶺至朔州一百里

東南至天門關二百四十里

西南至岢嵐軍一百五十里

戶

皇朝戶主四百一十四客二百八十一

太平寰宇記卷之五十終

太平寰宇記卷之五十一

河東道十二

蔚州

朔州

蔚州

蔚州

安邊郡今理興唐縣

禹貢冀州之域虞及周屬并州周禮

并州川曰嘔夷浸曰涑易今嘔夷在靈邱涑易在

飛狐皆在州境春秋時其地屬晉戰國時屬趙趙

襄子殺代王有其地其後武靈王置雲中雁門代

郡秦亦為代郡漢高帝元年項羽徙趙王歇為代

王二年陳餘迎歇還趙歇又立餘為代王三年韓

信斬餘置代郡領縣一十八東魏孝靜帝又于此
置北靈邱郡周宣帝于今理置蔚州隋大業三年
罷州置雁門郡之靈邱縣唐武德四年平劉武周
六年置蔚州寄治并州陽曲縣仍置靈邱飛狐二
縣七年寄治代州繁峙縣八年寄治忻州秀容之
北恆州城貞觀五年移于今理天寶元年改爲安
邊郡至德二年九月改爲興唐郡乾元元年置蔚
州

領縣三

興唐 靈邱 飛狐

州境

東西 缺

南北 缺

四至八到

南至東京 缺

南至西京一千六百三十里

南至長安二千里

東至易州山路三百二十里

南至鎮州取秦嶺路四百九十里

西至朔州三百八十里

東南至定州取轆轤路四百九十里

大平寰宇記 卷之五十一
西南至代州四百里

西北至朔州四百六十里

東北至媯州界孔嶺關一百里從關至媯州又一百五十里

戶

唐開元戶四千八百八十一

風俗

同代州

人物

馮唐

代人也以老爲郎

土產

熊皮 豹尾 雕翎 金 銀 大韭 後魏孝文帝以土地

沃壤慮軍食關山野多種大韭肥地皆長三尺葉廣如馬蘭但味少甘食之禦饑今圖經所謂大韭

多生于山野及平川是也 賦麻 布 花斑石

興唐縣 郭本漢靈邱縣地唐開元十二年于州東北

一百四十里橫野軍子城南置安邊縣屬蔚州天

寶元年改為安邊郡仍改安邊縣為興唐縣梁開

平二年改為隆化縣後唐同光初復舊晉初改為

靈仙縣漢初復舊 倒刺山在縣東七十里又號

雪山俗傳靈仙所居與五臺山略同 嘔夷河亦

曰瓠瓠河上槽狹下流闊形有似瓠瓠因名 橫

野軍置在州城內

靈邱縣

西南一百三十里今五鄉

本漢舊縣屬代郡後漢省東魏

靜帝重置屬靈邱郡隋開皇三年罷郡縣屬蔚州

大業二年省改隸代州隋末陷於賊唐武德六年

又置屬蔚州 高是山在縣西北七十里山海經

云高是之山滋水出焉土地記云鹵城東三十八

里有枚迴嶺北與高是山連麓接勢通爲高是山

太白山在縣南十里山有鍾乳穴其深不測仰

望穴中乳如懸穗滴瀝穴中有小水名石井 石

銘陘嶺在縣西北八十里上有石銘題言冀州北

界故謂之石銘陁 隘門山亦曰隘口今呼爲龍
門在縣東南十五里壁立直上層崖刺天有古道
極險隘後魏明元帝于此置義倉之所 嘔夷水
一名漉水出縣西北高是山周禮曰并州其川嘔
夷謂此也 滋水出縣西南枚迴山懸河五丈湍
激之聲響動山谷樵伐之士咸由此渡巨木淪湑
久乃方出或落崖石無不粉碎也 邠夷水經邑
界 射臺在縣南一十八里水經注云靈邱縣有
御射臺臺南有御射碑卽後魏文成和平二年南
巡于此路左有山高七百仞命羣臣射之不過半

帝乃射之箭過其頂三十餘仞落山南三百步遂刻石焉其碑現存陰刊從臣姓名 真谷關在縣

北七十里 開皇長城西自繁峙縣經縣北七十

里東入飛狐縣界 趙武靈王墓在縣東三十里

飛狐縣

東南一百里
一十二鄉

本漢廣昌縣地屬代郡後漢屬

中山國魏封樂進爲廣昌侯卽謂此後廢晉又屬

代郡周大象二年于五龍城復置廣昌縣卽此邑

也隋開皇三年改屬蔚州仁壽元年改廣昌縣爲

飛狐縣因縣北飛狐口爲名隋末陷賊唐武德六

年重置寄理今易州遂城縣界遙屬蔚州貞觀五

年移還今所 倒刺山在縣東北百二十里出椒
大黃 涑水亦名巨馬河今名涑水源也 磨笄
山一名靡笄山在縣東一百五十里史記趙襄子
姊爲代王夫人襄子旣殺代王迎其姊夫人曰以
弟慢夫非仁也以夫怨弟非義也磨笄自刎百姓
憫之爲立祠于山上今與媯川郡山相連又隋圖
經云趙襄子登之以觀代國一號看山按代地本
北狄姜姓之國周末强大在七國前稱王以今雲
中馬邑五原安邊定襄皆爲代國之北地焉 長
城按邢子勵記云飛狐界古長城也 交牙城水

經注云廣昌縣南有交牙城未詳所築以地有交
牙川爲名 板殿城水經注云廣昌縣南有古板
殿城 代城十三州志云古代城在飛狐界按盧
植說異云初置郡時方就板幹夜忽自移西南五
十里大澤中板幹自設結葦爲九門于是就以爲
城 三河冶舊置鑪鑄錢唐至德以後廢元和七
年宰臣李吉甫奏訪聞飛狐縣三河冶銅山約數
十里銅鑛至多去飛狐錢坊二十五里兩處同用
拒馬河水以水鞣銷銅北方諸處鑄錢人工絕省
所以平日三河冶置四十鑪鑄錢舊跡猶存事堪

覆實今但得錢本令本道應接人夫仍舊鼓鑄則
不三年以來其事卽立救河東困竭之弊成易定
援接之形制置一成久長獲利詔從之其年六月
起工至十月置五鑪鑄錢每歲一萬八千貫時朝
廷新收易定河東久用鐵錢人不堪弊至是俱受
利焉 飛狐道自縣北入媯州懷戎縣界卽古飛
狐口也漢書酈食其說漢王曰杜白馬之津塞飛
狐之口此皆言一方之阨也又晉中興書曰建興
中劉琨自代出飛狐口奔于安次是此道也 香
山上有古寺在縣城中

朔州

朔州 馬邑郡今 禹貢冀州之域春秋為北狄之地秦

理鄯陽縣

為雁門郡在漢即雁門郡之馬邑縣也史記漢高
帝以韓王信居太原郡為韓國以備胡信以晉陽
去塞遠請理馬邑上許之後為匈奴圍信數求救
上賜書責信信懼以馬邑降胡與胡同居參合漢
將軍柴武後屠參合以殺信參合即代郡縣也漢
末大亂匈奴侵邊自定襄已西雲中雁門之閒遂
空建安末曹操北征集荒郡之人又立馬邑縣屬
新興郡至晉改屬雁門郡晉亂其地為猗盧所據

晉懷帝時劉琨表以鮮卑猗盧爲大單于封代公徙馬邑縣卽其地也後魏都代地卽今郡屬畿內至孝文遷洛之後又于今州北三百八十里定襄故城置朔州領盛樂廣牧二郡葛榮之亂州郡又廢高齊天保六年又于今州西南四十七里新城置朔州八年仍移于馬邑城卽今城也武成帝置北道行臺周武帝置朔州總管隋開皇罷總管府大業三年罷州爲馬邑郡唐武德四年置朔州領鄯陽常寧二縣其年省常寧縣天寶元年改爲馬邑郡乾元元年復爲朔州

領縣二

鄠陽 馬邑

州境

東西四百八十里 南北九十七里

四至八到

南至東京

缺

南至西京一千三百五十里

西南至長安一千七百二十里

東至蔚州四百六十里

南至代州界一百四十六里

西至嵐州三百七十四里

北至單于大都護府三百五十七里

東南至代州界一百二十里

西北至單于府一百二十里

東北至故雲州二百六十里

戶

唐開元戶六百三十

風俗州同代

人物

張遼

字文遠馬邑人為魏征東將軍

賀拔勝

字破胡神武人為僕射

尉

太平寰宇記 卷之五十一
遲恭

字敬德馬邑人封鄂國公

安重榮

土產

雕翎

肉菘蓉

豹尾

貢

甘草

鄯陽縣

入本漢馬邑縣屬雁門郡漢末荒廢建安中

又置屬新興郡晉又屬雁門郡晉末又廢高齊于此置招遠縣屬郡不改隋開皇三年罷郡改隸朔州大業元年改爲鄯陽縣

白登山在紇真山北

十里 武周山冀州圖云武周山在郡西北東西

數百里南北五十里山之南面千仞壁立 紇真

山冀州圖云在城東北三十里登之望桑乾代郡

數百里內宛然夏恆積雪故彼人語曰紇真山頭
凍死雀何不飛去生處樂又有神泉人歌曰紇真
山頭有神井入地千尺絕骨冷 元姬山後魏書
云道武侍人姓李善謳謔死葬此山魏主思之樂
府爲之曲其曲存焉 紫塞河源出州界馬邑地
一名金河南流合桑乾河在縣東十里 白樓郡
國志云卽後魏納姚女爲后悲思故國造此樓登
望飾以鉛粉故名之 馬邑城卽今州城也搜神
記云昔秦人築城于武周塞內以備胡城將成而
崩者數矣忽有馬馳走周旋反覆父老異之因依

太平寰宇記 卷之五十一
走迹以築城城乃不崩遂名馬邑 陰館城今名

下館城地理志云陰館縣屬鴈門郡 太平城後

魏穆帝所理此城冀州圖云太平城城上埤垣卻

敵在內郭城東西南北各十里內有統萬所送大

釜二口各受二百石 新城一名平城卽猗盧所

都 安邊縣城唐開元十七年置縣在橫野軍城

內其後移理不定 故武郡城冀州圖云梁郡城

在鄴陽北二十里卽余朱榮所居 秀容川按川

東北接恆州南接肆州西限大河北接朔州東西

六百里南北四百餘里 楊泉冀州圖云後魏太

和中文明皇太后來幸遂釣得鯉魚一雙皆長三尺以黃金爲鎖穿鰓放于池內後皆長五尺其一浮天爲五色虹而去久之而滅後一在池至孝昌元年六月行臺元淵北伐頓此決池取魚鱗甲非常而淵忍而殺之得金二觔八兩淵來年爲葛榮所殺 句注山在縣東南八十里 河水在縣西南三百里

馬邑縣

東三十里二鄉

本漢縣屬鴈門郡自後魏末陷入虜

中唐貞觀以來爲大同軍城其地屬鄯陽縣理至開元五年分鄯陽縣東三十里置大同軍以戍邊

復于軍內置馬邑縣徵舊名也此邑自置有戶無
稅建中年間河東節度使馬燧權移州于馬邑縣
桑乾河在縣東三十里源出于北山下 廢單
于都護府在州西北三百五十七里本秦漢時雲
中郡城也唐龍朔三年置雲中都護府麟德元年
改爲單于大都護府振武軍在城內管金河縣一
與府同置今竝廢

校勘

朔州

鄯陽縣

紇真山冀州圖云

按太平御覽書目有冀州圖經今記凡舉
圖經但云圖閒亦有云圖經者今皆仍其
故

太平寰宇記卷之五十一終

太平寰宇記卷之五十二

河北道一

孟州

孟州

河陽郡今理河陽縣

禹貢爲冀豫二州之域卽武王伐紂

師會盟津在周爲畿內蘇忿生之邑後爲晉邑故

左傳云文公大敗楚師襄王自往勞之書曰天王

狩于河陽是也後屬魏魏哀王改爲河雍至漢又

爲河陽縣魏晉因之屬河內郡後入後漢劉聰後

秦姚泓亦如之後魏莊帝時梁陳慶之來伐克洛

陽渡河守北中府城卽今河陽城也按城本太和

中所築至北齊得其地天保七年省邑額賦升入
溫軹二縣以城卽爲軍戍故北齊書云神武使潘
樂鎮北中城又使高永樂守南城以備西魏其中
渾城卽東魏所築仍置河陽關以是之後將帥有
河陽三城使隋開皇十六年又置河陽縣以屬懷
州唐武德初改爲大基縣四年平王世充隸盟州
八年省之咸亨五年復置大基縣于今理後以諱
復爲河陽縣開元初年以溫河陽汜水濟源河清
五縣爲東京畿邑屬河南府其稅權隸三城使至
德中李光弼禦史思明之寇也光弼移牒留守河

南尹令留司官坊市居人悉出避寇空其都城乃
出麾下士馬數萬東守河陽三城賊初謂光弼自
洛而西及聞保河陽出其意外久之不敢犯宮闕
光弼訓練招集威聲大振賊雖入城憚光弼威兵
南不出百里西不越畿內陝州得修戎備關內無
虞皆光弼保河陽之力會昌三年中書門下奏河
陽五縣自艱難以來割屬河陽三城使其租賦色
役盡歸河陽河南尹但總管名額而已使歸一統
便爲定制既是雄鎮足壯三城其河陽望升爲孟
州尋有敕割河陰隸孟州河清還河南府時河陽

節度使以懷州爲理所會昌四年又割澤州隸河陽節度使仍移理所于孟州皇朝爲河陽軍節度使

領縣五

河陽 温縣 汜水 河陰 濟源

州境

東西二百九十四里 南北五十里

四至八到

東南至東京三百五十里

西南至西京七十里

西南至長安九百十里

東至滑州四百四十里

西至絳州五百六十里

南至汝州二百五十里

北至懷州七十里

東至鄭州二百里

東北至衛州三百二十里

西北至澤州二百里

戶

舊戶載河南府

皇朝戶主一萬四千二百三十五客七千五百五十七

風俗

河南覃懷之地于周為畿內今所管縣本屬河內故風俗與周地略同漢書云子男之國號為大

國號

即今汜水縣也恃勢與險崇侈貪冒

人物無

土產

古貢黃魚鮓 今貢梁米 石榴

河陽縣

依舊三鄉

本周蘇忿生之邑後為晉邑城西臨黃

河卽古盟津之地秦爲河雍縣漢爲河陽縣以在
河之北爲名屬河內郡今縣西北三十五里有古
城卽漢理冀州圖云河陽在河內郡南六十四里
有宮有闕魏晉如之潘岳曾爲令高齊省入溫軹
二縣隋開皇十六年分溫軹二縣重置屬懷州唐
武德四年平王世充後割屬河南府今屬孟州
嶺山在縣西北三十里岡嶺橫亙故以爲名 孟
津夏禹將興神龜負圖出洛并武王觀兵皆此津
也蘇忿生十二邑有盟今平陰縣北孟津是也或
謂之富平津或謂之小平津或謂之陶河渚卽異

名也今在縣南卽魏尙書僕射杜畿試船沈沒之所尋立爲河陽關是也 南浮橋在縣南一里卽泰始十年杜征南造晉武帝勞預曰非卿不能造此橋預對曰非陛下聖明臣不能施其功卽此橋也 北中府城卽郡城也洛陽記云太和二十年造北中府城又有南城與縣接乃東魏元象二年所築高齊于其中置行臺周武帝平齊又改爲河陽鎮隋煬帝又改置河陽宮後入唐宮廢 古城在縣西三十里卽天王所狩之地 板城在縣西北三十五里左氏傳隱公十一年王以易鄭餘邑

卽此 踐土城冀州圖云在縣東七里洛陽西北
四十二里左傳盟于踐土是也 向城卽春秋十
二邑之一在今縣西北二十五里古向國春秋謂
向姜不安莒而歸 閭坎左傳周甘人與晉閭嘉
爭閭田一名閭坎今解縣是也 遮馬堤在今縣
西南十三里卽後魏尔朱榮殺朝士千三百人于
此堤

温縣

東北五十里舊
七鄉今五鄉

本周畿內司寇蘇公之邑春秋

僖公十年狄滅温温子犇衛周襄王勞晉文公而
賜之漢以爲縣屬河內郡隋屬懷州大業十三年

太平寰宇記卷之五十一
五
自故温城移于今所唐武德四年隋温縣令周仲
隱以縣歸乃以縣置平州以仲隱刺焉因改邑城
爲李城其年廢州復爲温縣以屬孟州後以建都
河洛因以隸焉自天寶之後稅賦輸河陽會昌中
于河陽置孟州以縣隸焉 馬場原俗謂原爲坎
蓋後魏遷都洛于此原牧馬故有馬場之名 洑
水在故城西東南流注于河按述征記云洑水經
河內温縣注于河又九州記云濟水一名沔水出
濟源山 李城今縣城是也本李侯國史記秦圍
邯鄲傳舍吏子李同說平原君得敢死之士三千

人赴秦軍爲卻三十里亦會楚魏救至秦軍遂罷
李同戰死封其父爲李侯徐廣曰河內平皋縣有
李城 號公臺俗名賀酒臺皇覽云河內温城南
有號公臺相傳云晉宣帝故邑集温父老登此臺
宴飲父老奉觴慶賀因謂之賀酒臺 古温城在
縣西南三十里周司寇蘇忿生邑漢爲縣東魏孝
靜帝天平中移縣于故城東北七十里隋大業十
三年又移縣于今理

汜水縣

東北九十里舊三鄉今四鄉

古東號國春秋鄭之制邑漢

爲成皋縣屬河南郡左傳謂制巖邑也號爲鄭所

滅穆天子傳云天子獵于鄭國有虎在葭中七萃之士擒之以獻命畜之東號號曰虎牢今邑界有虎牢城存焉戰國屬韓秦屬三川楚漢相拒于滎陽成臯卽此地後爲縣北臨黃河後漢爲成臯關魏又爲縣復屬河南郡晉隸滎陽郡宋武帝北平關洛置司州後魏明帝置北豫州太和十九年罷州置中郎將府孝靜帝天平元年罷府又置北豫州并成臯郡同理于此高齊天保七年省北豫州周宣帝宣政元年置滎州隋開皇元年改爲鄭州三年置成臯郡十六年分鄭州置管州十八年改

爲汜水縣唐武德四年分置成皋縣貞觀元年省
入汜水縣以屬鄭州顯慶二年改屬河南府垂拱
四年改爲廣武縣神龍元年復爲汜水縣會昌中
屬孟州 黃河自鞏縣界流入 汜水出縣東南
四十二里 三山山有三峯故以爲號 鵲山在
縣北竇建德軍敗于此 方山在縣東南四十二
里山海經云浮戲之山汜水出焉水經注云浮戲
山俗謂之方山經武牢城東漢破曹咎于此 旋
門坂在縣西南十里東京賦云東門于旋又西征
賦云望河洛之交流看成皋之旋門 汜水有二

焉竝在鄭地春秋天王出居于汜是南汜在許州
襄城縣界非此也今在成臯城東按京邦要記云
板渚牛口渚在汜水縣東北郡國縣道記云汜水
出縣南方山經縣東始合于河 厄井在縣東北
七十里風俗通謂漢高祖與項羽戰敗于京索遁
入蒲井鳩止鳴其上追者以爲無人遂得脫因名
厄井又九州要記云丁公抱石欲填之是此井郡
國志云堯井在縣東十五里卽厄井也未明孰是
板城城東北三十里有津亦謂板渚 虎牢城
卽其叔段之邑也 成臯故關在縣東南二里南

門名成皋北門名王路洛陽記云洛陽在四關之內左成皋關隋大業九年移成皋關于虎牢城西邊黃河當汜水之上按故關在縣東今在縣西

旋門關在縣西南十里卽八關之一也 牛口渚

在縣北與板渚迤邐相接唐初竇建德率眾十萬自板渚結陣南屬鵠山以臨汜水太宗率輕騎擊之大潰建德竄入牛口渚將軍白士讓生獲之先是童謠云豆入牛口勢不得久果敗于此 等慈寺在縣東七里唐師旣破建德有詔于戰所起寺立碑以紀功焉 河侯神在縣東北四十里隋開

皇七年通渠之日於大河分流之處立此祠往來
商賈禱祀不絕焉

河陰縣

東北一百二十里
舊三鄉今二鄉

其地卽汜水滎澤武陟三

縣之地也開元二十二年侍中裴耀卿奏以地當
汴河口便于漕運宜析上三縣之地置縣以頓之
因在河之南故于輸場東渠口北二百五十步立
河陰縣焉卽今理所 三皇山亦曰敖鄩山山上
有三城卽是楚漢相持于此 汴渠在縣南二百
五十步首受黃河一名通濟渠一名蒗蕩渠漢書
謂滎陽漕渠如滄曰今礪溪口是也水經云河水

又東過滎陽北蒗蕩渠出焉酈道元注云大禹塞滎澤開渠以通淮泗又後漢書初平帝時河汴決壞未及得修汴渠東侵日月彌廣水門故處皆在河中永平十二年議修汴渠乃引樂浪人王景問治水形便景陳其利害應對敏給帝善之乃賜景山海經河渠書禹貢圖及錢帛秘物遂發卒數十萬遣景與將作謁者王吳修渠築堤起自滎陽東至千乘海口千餘里景乃商度地勢鑿山截澗防遏衝要疏決壅積十里立一水門令更相澗注無復潰漏之患明年渠成帝親巡行詔濱河郡國置

河堤員吏如西京舊制順帝陽嘉中又自汴口以東緣河積石爲堰通淮亦名金堤靈帝建寧中又增修石門以遏渠口又坤元錄云自宋武北征之後復皆堙塞隋大業元年更令開導名爲通濟渠西通河洛南達江淮煬帝遊江淮于此泛龍舟至江都其交廣荆揚益越等州運漕卽此渠也 梁王堰在縣西二十里又名梁公堰本漢平帝時汴河決壞至明帝永平中乃令王景理梁堤其後通塞各計朝代隋開皇七年使梁睿增修古堰遏河入汴故謂之梁公堰

濟源縣

西北四十里
依舊四鄉

卽周畿內地亦蘇忿生之邑今

古城尙存在縣西北二里左傳云襄王賜晉文公

濟西之田後屬魏漢爲軹縣之地隋開皇十六年

分軹地立濟源縣屬懷州以濟水發源于此爲名

隋末省軹入濟源唐武德二年王世充將丁伯得

以邑歸順遂于此置西濟州以濟源溟陽蒸川邵

原四邑以隸焉仍以伯得爲刺史四年省縣入懷

州顯慶二年建都河洛以隸之會昌中復隸孟州

太行山相傳謂皇母山也或名女媧山其上有

祠民祈福而歲禱焉其山起于邑界 陵山爾雅

云大阜爲陵俗以孤絕似陵因謂之陵山 孔山
在縣東北四十里水經注云山上石穴洞開穴內
石上有車轍馬跡自然成著非人功所就 沁水
在今縣北二十八里兼有故沁水城是此 濟水
在縣西北三里平地而出有二源其東源周迴七
百步其深不測西源周迴六百八十五步深一丈
皆繚之以周墻源出王屋山山海經云王屋之山
澗水出焉郭璞注云澗沈水之源尙書禹貢云導
沈水東流爲濟入于河溢爲滎孔安國注云濟水
入河竝流數十里而南截河又竝流數里溢爲滎

澤按禹貢導沅水東流爲濟入于河溢爲滎東出
于陶邱北又東至于荷又東北會于汶又北東入
于海顏師古云導沅水而爲濟截河又爲滎澤陶
邱在今曹州定陶西南過荷澤又與汶水會北折
而東入海也按沅水出今王屋縣王屋山東流至
濟源縣而名濟水滎澤在今鄭州滎澤縣定陶今
曹州濟陰縣是也荷澤在今兗州魚臺縣汶水在
今兗州萊蕪縣然濟水因王莽末旱渠涸但入河
而已不復截河南過今東平濟南淄川北海界中
有水流入于海謂之清河實荷澤汶水合流亦曰

濟河蓋因舊名非本濟水也而水經是和帝以後
所撰乃言濟水南過滎澤至于乘氏等縣一依禹
貢舊道斯不詳之甚也酈道元又從而注之其所
纂序尤爲紕繆矣又九州記云濟源縣有慢流水
玉漿澗木溝皆會于濟也 皮城在城東南三十
八里卽春秋時陽樊邑 忿生邑有故城在今縣
西北二里 軹縣故城史記云秦昭王伐魏取軹
漢爲縣故城在今縣東南三十里卽漢文帝封舅
薄昭爲軹侯是此高齊拒周使斛律光築關于此
以屯戍卒按郡國縣道記云後魏自此城移縣于

今縣東南三十八里皮城置大業二年省之 濟
源古城在古縣西北九里卽史記謂晉文公伐原
是也 陵山在城西北 靈井東魏以鎮西將軍
平鑿爲懷州刺史乃于軹關築城以防西魏新城
少水有一土井隨汲卽竭鑿乃具衣冠俯井而祝
俄而井泉涌出合城不缺此井今在故城中 沁
臺在縣東北三十里與古城相去五里 故軹關
在今縣西十一里

校勘

孟州

河陽縣

板城

按板城莫知爲何邑疑刊字而誤然無所
考

太平寰宇記卷之五十二終

太平寰宇記卷之五十三

河北道二

懷州

懷州

河內郡今理河內縣

禹貢冀州之域星分張宿九度禹貢

覃懷底績至于衡漳太行山在焉殷時爲畿內周

時爲三監邶鄘衛地亦爲衛邶雍三國及管蔡廢

黜封康叔以爲懷侯于此地卽爲衛衛遷河南晉

文公霸始啟南陽又爲晉地故左傳襄王賜晉文

公陽樊温原攢茅之田晉于是始啟南陽杜預注

云在晉山之南河之北故曰南陽也又曰武王克

商蘇忿生以温爲司寇其田有隕懷戰國時爲魏
衛二國之境史記云秦襄王伐魏取軹又竹書紀
年云秦師伐鄭至于懷殷始皇并天下以今州地
屬三川河東二郡又按史記始皇六年拔衛其君
徙居野王阻其山以保之胡亥廢衛君角爲庶人
以其地屬三川河南二郡之境河東郡之東境史
記云項羽立司馬卬爲殷王王河內漢高帝初又
爲殷國至二年卬降以其地爲河內郡治懷舊壤
卽覃懷故地漢書地理志云魏地東盡河內領懷
等一十八縣屬于司隸後漢世祖南定河內難其

守鄧禹舉寇恂世祖謂恂曰河內完富吾將因是而起昔高祖留蕭何鎮關中吾今委公以河內恂遂伐淇園之竹治矢百餘萬養馬二千匹收租四百萬斛以給軍事由是東漢之業濟焉晉爲河內汲二郡地後魏置懷州兼置河內郡治古野王城是也隋開皇三年郡廢而州存十三年改野王縣爲河內縣大業二年州廢復爲河內郡唐武德二年陷于王世充其年以濟源西南柏崖城置懷州領大基河陽集城長泉四縣其年于濟源立西濟州武德縣立北義州修武縣東北故濁鹿城立陟

州懷州置總管府管懷西濟北義陟四州三年懷州又置太行紫陵忠義穀巨温五縣四年移懷州于今野王城其年又于温縣置平州以温縣屬之又省穀巨太行忠義紫陵四縣後省平州仍于隋河陽宮置盟州領河陽集城温三縣又省西濟北義陟三州又于獲嘉縣置殷州其懷州總管管懷殷盟三州懷州領河內武德軹濟源四縣八年廢盟州省集城入河陽以河陽温二縣來屬貞觀元年罷都督府以廢殷州修武獲嘉武陟廢邵州之王屋四縣來屬仍省懷軹二縣顯慶二年割河陽

温濟源王屋四縣屬洛州天寶元年改爲河內郡
乾元元年復爲懷州

領縣五

河內 武德 修武 武陟 獲嘉

州境

東西二百一十七里 南北一百一十五里

四至八到

東南至東京三百三十里

西南至西京一百四十里

西南至長安八百七十九里

太平寰宇記 卷之五十三
東至衛州二百六十里

南渡河至鄭州一百九十里

西至河南府濟源縣七十三里

北至澤州一百四十里

東南至鄭州一百五十六里

西南至河南府一百四十里

西北至河南府界一百七十里

東北至衛州二百六十里

戶

唐開元戶四萬三千一百七十

皇朝戶主一萬一千三百五十六客三千五百六十八

風俗

河內覃懷之地于周爲畿內今所管縣本屬河南故風俗與周地略同漢書云子男之國虢郟爲大虢國卽今汜水縣也

姓氏

河內郡八姓 梁 何 車 常 荀 淳于

司馬

人物

聶政軹人 四皓軹人 張禹字子文河內軹人

郭解字翁伯軹人 丁蘭河內人 郭巨河內人 張奉河內人

修武人有孝行子表字公儀遭奉喪表後每彈琴惻愴不能成聲 司馬朗溫人九歲

人道其父字朗曰慢 常林年七歲父黨造門問人者不敬其親也

答曰臨子字 王象字義伯河內人少孤貧牧羊父何拜之有

世稱 山濤河內懷人爲山簡字季倫濤子由

督出鎮 向雄河內人爲郡主簿太守王經 藥

崧河內人天性忠樸爲尚書郎 向秀河內人 向柳字玄季

唐李商隱懷州河內人 司馬承禎河內溫人隱天台

道錄 穆寧懷州河內人有家法 張鎬懷州人起家

土產

絲 絹 綿

絕入貢

朱膠

河內縣

舊二十一鄉今六鄉

春秋時野王邑左傳晉人執晏弱

于野王杜預云河內野王縣也七國時屬韓漢為

野王縣屬河內郡隋開皇十三年改野王為河內

縣因晉徙河內郡于此為名唐武德四年自柏崖

城徙郡于此 太行山在縣北二十五里禹貢曰

太行恆山至于碣石注云二山連延接碣石左傳

齊侯伐晉為二隊入孟門登太行穆天子傳曰天

子命駕八駿之乘赤驥之駟南征翔行逕絕翟道

升于太行南濟于河淮南子曰武王欲築宮于五行之山周公曰五行險固德能覆也高誘注云今野王太行山也今上有孔子廟石室 太行陁在縣西北三十五里連山中斷曰陁述征記云太行山首始于河內北至幽州凡百嶺巖互十二州之界有八陁第一軹關陁今屬河南府濟源縣在縣理西十一里第二太行陁第三白陁此兩陁今在河內第四溢口陁在鄴西第五井陘第六飛狐陁一名望都關第七蒲陰陁此三陁在中山第八軍都陁在幽州太行陁闊三步長四十里 沁水在

縣北四里北自濟源界流入 丹水北去縣七里
東北自澤州沁水縣界流入分溝灌溉百姓資其
利焉 濟水經縣西南去縣三十里 大臺水後
漢光武遣王梁擊赤眉賊處 新城壘在縣東北
九里唐武德三年劉德威于此置營 古軹城在
縣西北二十七里今軹城太行之南道出其中

紫陵澗唐武德三年置紫陵縣縣近澗因以爲名

古野王城冀州圖云野王城卽今懷州理也史
記云衛元君爲秦所奪自濮陽徙此 嵇康鍛竈
康卽晉之七賢也今有竹林尙存并鍛竈之所宛

在 孔子廟夫子欲北之趙趙鞅殺大夫竇鳴犢
夫子至此聞之傷悼遂不過河今有夫子廟

武德縣

東北四十七里舊二十鄉今五鄉

本周司寇蘇忿生之州邑

漢以爲縣屬河內郡東魏于此置武德郡隋文帝
十六年改爲邢邱縣大業二年改邢邱爲安昌縣
唐武德二年改安昌爲武德縣 太行山在縣北
五十里 沁水在縣北二里東流 平皋陂在縣
南二十三里陂多菱蓮蒲葦百姓資其利周迴二
十五里陂南卽黃河 安昌故城在縣東南十里
漢成帝封丞相張禹爲安昌侯卽此地 南北斗

城冀州圖云南斗城在今縣北三十里北斗城在縣北五十一里又郡國縣道記云武德有故雍城在縣西北三十五里疑此是也 平皋城在今縣西左傳赤狄伐晉圍懷及邢邱注云邢邱今河內平皋縣是也漢置平皋縣又高祖封劉它爲平皋侯 故大斛關在縣北一百六里

修武縣

東北一百二十里舊十五鄉今五鄉

本殷之甯邑韓詩外傳云

武王伐紂勒兵于甯故曰修武左傳曰晉陽處父聘于衛過甯注云汲郡修武縣是也漢以爲縣屬河內郡東魏置西修武縣尋省高齊天保七年自

今獲嘉縣移修武縣于西修武故城隋大業十年
又移于永橋即今武陟縣其城又空復移于今縣
東北二十三里濁鹿故城置即魏帝受禪所也唐
武德二年于濁鹿城置陟州領修武縣四年州廢
屬殷州六年又移修武于廢西修武故城即今理
也貞觀元年省殷州屬懷州 太行山在縣北三
十二里 天門山今謂之百家巖在縣西北三十
七里以巖下可容百家因名上有精舍又有鍛竈
處所云即嵇康所居圖經云巖有劉伶醒酒臺孫
登長嘯臺阮氏竹林嵇康淬劍池並在寺之左右

山陽城北有秋山卽嵇康之園宅也 五里泉

水經注五里泉在修武鄉 濁鹿城在今縣西北

三十七里魏志文帝受禪封獻帝爲山陽公居河

內山陽之濁鹿城卽此城周迴一十五里尙在

禪陵在縣北三十五里獻帝陵也以禪魏故名焉

武陵故城在縣南二十五里東魏置太寧郡後

周廢 太寧城在縣東南三十八里舊名西邸閤

城 習鑿齒墓在縣西南太平鄉一作郡

武陟縣東南一百里舊本漢懷縣地隋開皇十六年

分修武縣置武陟縣理故城今縣東二十里武德

故城是也屬殷州唐貞觀元年省殷州屬懷州

沁水在縣東一里 故殷城在縣東南十里楚漢

之際司馬卬為殷王理此 故懷縣城春秋傳云

赤狄伐晉圍懷卽此在縣西十一里兩漢河內郡

竝理之晉移郡理于野王

獲嘉縣 南北一百六十里 舊二十鄉今七鄉 春秋時甯邑地漢為獲嘉

縣按漢書曰武帝將幸緱氏至汲縣之新中鄉得

南越相呂嘉首因立為獲嘉縣屬河內郡此前獲

嘉縣理在今衛州新鄉縣西南十里獲嘉故城是

也西晉曾立為殷州高齊又移獲嘉縣于衛州之

共城縣隋開皇四年自共城移于今理十六年又立殷州唐初州廢復爲縣還河內 黃河在縣南四十里 清水酈道元注水經云黑山在縣北白鹿山東清水所出也上承諸陂散泉積以成川南流西南屈瀑布垂巖懸河注壑二十餘丈又冀州圖云清水出共城西北界白鹿山東南流入汲郡 吳澤陂在縣西北一十五里 七賢祠在縣西北四十二里阮籍等遊處水經注云七賢祠左右筠篁列植冬夏不變向子期所謂山陽舊居卽此祠之處也 同盟山在縣東北五里武王伐紂與

太平寰宇記卷之五十三
諸侯同盟此山因名焉

太平寰宇記卷之五十三終